

29 AUG 2003

Merdeka-Raptai

RAPTAI TERAKHIR HARI KEBANGSAAN BERJALAN LANCAR

PUTRAJAYA, 29 Ogos (Bernama) -- Raptai terakhir perarakan Hari Kebangsaan ke-46 yang diadakan hari ini berjalan lancar walaupun para peserta terpaksa membuat persembahan atau berbaris dalam hujan yang turun untuk seketika di sini.

Acara yang berlangsung di Dataran Putrajaya, merangkumi Boulevard yang menjadi laluan utama perarakan itu, disaksikan oleh Menteri Kebudayaan, Kesenian dan Pelancongan Datuk Abdul Kadir Sheikh Fadzir.

Bercakap kepada pemberita kemudian, beliau berpuas hati dengan raptai itu dan meminta seluruh lapisan masyarakat hadir beramai-ramai untuk menyaksikan perbarisan dan perarakan sebenar Ahad ini.

"Saya yakin perarakan ini akan menjadi sesuatu yang luar biasa sesuai dengan hasrat kita untuk memberikan penghargaan kepada Perdana Menteri Datuk Seri Dr Mahathir Mohamad," katanya.

Hari Kebangsaan tahun ini, yang sekali lagi membawa tema "Keragaman Malaysia", ialah yang terakhir dihadiri Dr Mahathir sebagai Perdana Menteri berikutan keputusannya untuk melepaskan jawatan pada Oktober.

Seramai 22,640 orang akan menyertai perarakan itu yang buat julung kali diadakan di Putrajaya. Ia dijangka menarik antara 300,000 dan 400,000 pengunjung.

Abdul Kadir berkata kementerian itu menjemput 51 stesen televisyen dan kira-kira 300 wartawan serta petugas media dari luar negara untuk membuat liputan sambutan Hari Kebangsaan termasuk acara Ambang Merdeka malam esok.

-- BERNAMA

MAM RON